

De Nikolaus kummt heit

Endlich is soweit:
de Nikolaus kummt heit.
Mer hann schunn lang gewaait
uff denne Mann me'm Bart.

Er hat, des is bekannt,
e wunnerschää Gewand.
Un uff seim Kopp, ganz spitz,
do sitzt e goldni Mitz.

Un aus seim Buch, do lest er vor
die Kinner, die wo iwwer's Jahr
net brav war'n un net hann geheert,
wann de Lehrer was erklärt,
un Hausaufgabe als net mache,
doch dodefor viel ann're Sache,
die, wo mer net mache soll:
Mit denne Kinner werd gescholl.

Doch in sei'm Buch, da steh'n aa drin
Kinner, wo stets fleißich sinn,
wo immer brav sinn un ehr Sache,
wo se mache solle, mache.

Er kennt se all, er wääß Bescheid,
drum is er zu uns her kumm heit.
Trotz Sturm, trotz Hagel un trotz Schnee
besucht er uns in Martinsheh.

So sei willkomme do im Haus,
lieber, guter Nikolaus!



Günter Mannweiler

*Dieses Gedicht stammt aus meiner schönen Zeit
an Grundschule in Martinshöhe (Mertsheh).*